



Adresseinformasjon fylles inn ved ekspedering.
Se mottakerliste nedenfor.

Dato: 26.11.2018
Vår ref: 14/00408-30
Deres ref:

Tildeling av driftskonsesjon etter minerallova for Samfjorden massetak i Haram kommune. Tiltakshavar: Opshaug Sandtak AS

Leiv Erikssons vei 39
Postboks 3021 Lade
N-7441 Trondheim

TELEFON + 47 73 90 46 00
E-POST mail@dirmin.no
WEB www.dirmin.no

GIRO 7694.05.05883
SWIFT DNBANOKK
IBAN NO5376940505883
ORG.NR. NO 974 760 282

SVALBARDKONTOR
TELEFON +47 79 02 12 92

Direktoratet for mineralforvaltning med Bergmeisteren for Svalbard (DMF) visert til
søknad om driftskonsesjon datert 17.12.2014 fra Opshaug Sandtak AS med org.nr.
915 031 676.

1. Tildeling av driftskonsesjon

Opshaug Sandtak AS med org.nr. 915 031 676, heretter kalla «Tiltakshavar» eller
«Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av mineralske ressursar i Samfjorden
massetak på del av eigedomane 79/2 og 80/6 i Haram kommune. Mineralførekomsten
hører til kategorien mineral som grunneigaren eig.

Konsesjonsområdet har eit areal på kring 39 daa og går fram av vedlegg 1.

Etter reguleringsplan «Massetak i Samfjord» datert 13.12.2012 er området regulert til
«Steinbrudd og massetak».

DMF gjer merksam på at ein driftskonsesjon gjeve i medhald av minerallova ikkje
erstattar krav om løyve, godkjenning, arealplan eller konsejon etter annan lovgjeving.
Tiltakshavar er ansvarleg for å innhente andre nødvendige løyve.

2. Vilkår for driftskonsesjonen

Konsesjonen blir gjeven på desse vilkåra:

2.1. Driftsplan

Drifta skal til ei kvar tid gå føre seg i samsvar med ein driftsplan godkjend av DMF.

Dersom Tiltakshavaren ønskjer å gjere vesentlege avvik frå driftsplanen, skal DMF
godkjenne dette på førehand.



DMF kan krevje ny oppmåling og at ajourførte kart og profilar skal sendast inn når DMF finn det nødvendig.

2.2. Økonomisk sikkerheit

Tiltakshavaren blir pålagd å stille økonomisk sikkerheit med NOK 840 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 300 000, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Innan 2 månader etter datoén på dette konsesjonsvedtaket skal Tiltakshavaren ha:

- (i) inngått ein avtale om finansiell sikkerheit med DMF, vedlegg 2
- (ii) lagt fram påkravsgaranti frå bank som DMF vurderer som tilfredsstillande, vedlegg 3
- (iii) etablert pantet til fordel for DMF, jf. pantelova §§ 4-4 til 4-6, vedlegg 4.

2.3. Bergteknisk ansvarleg

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

2.4. Anna vilkår

Konsesjonsgrensa for massetaket skal setjast ut eller markerast i terrenget, slik at den er lett synleg gjennom heile driftsperioden.

Vilkår knyttet til naturmangfald:

Tiltakshavar påleggjast følgjande vilkår knyttet til vedtakets punkt 5.7 om naturmangfald:

- Det skal etablerast ein sedimenteringsdam for å hindre små steinpartiklar i å nå skulstadhavet og vassfaret mellom pollen og Samfjorden.
- Massar som blir tilført skal ikkje innehalde frø eller plantedelar av framande, skadelege organismar.

3. Godkjenning av driftsplan

DMF godkjenner driftsplanen for Samfjorden massetak i Haram kommune. Den godkjende versjonen av driftsplanen ligg ved dette konsesjonsvedtaket.

4. Høyringsfråsegner med kommentarar frå DMF

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Haram kommune, Møre og Romsdal fylkeskommune, Fylkesmannen i Møre og Romsdal, Statens vegvesen, Norges vassdrags- og energidirektorat, Nordvest Nett AS, Mørenett AS og andre rørte partar.

Høyringsperioden var frå 20.09.2018 til 18.10.2018.



DMF har motteke høyringsfråsegn frå Kristin H. Breivik, Statens vegvesen, NVE, Fylkesmannen i Møre og Romsdal, Møre og Romsdal fylkeskommune og Mørenett AS.

Frå høyringsfråsegnene har DMF særleg merkt seg dette:

Kristin H. Breivik

Ein attgjeving av vesentlege delar av Kristin H. Breivik sitt høyringsfråsegn:

«Som grunneigar, har eg lese gjennom dokumenta og studert dei vedlagde karta. Eg har ingen merknader til konsesjonssøknaden.»

DMF sin kommentar

DMF tek Kristin H. Breiviks høyringsfråsegn til etterretning.

Statens vegvesen

Ein attgjeving av vesentlege delar av Statens vegvesen sitt høyringsfråsegn:

«Området er regulert. Gjeldene reguleringsplan er «Massetak i Samfjord» vedtatt i 2012. Utforming av avkjørsel fra fylkesveien og øvrig areal langs veien må være i tråd med krav i Vegnormal N100. Ut over dette har vi ingen merknad i saken.»

DMF sin kommentar

DMF gjer Tiltakshavar merksam på Statens vegvesen sitt høyringsfråsegn kva gjelder krav til avkjørsel og anna areallangs vegen. Ut over dette tek DMF utsegna til etterretning.

Noregs vassdrags- og energidirektorat (NVE)

Ein attgjeving av vesentlege delar av NVE sitt høyringsfråsegn:

«Førekomsten består av gneis som skal nyttast til byggeråstoff. Det er estimert eit årleg uttak på om lag 20 - 25 000 m³ og et totalt uttak på om lag 600 000 m³. Området ligg innanfor reguleringsplan Massetak i Samfjord, vedteken i 2012.

Det er fleire kraftleidningar i og like ved uttaksområdet. NVE legg til grunn at det vert tatt tilstrekkeleg omsyn til desse slik at anlegga ikkje vert skada i samband med drifta.»

DMF sin kommentar

DMF gjer Tiltakshavar merksam på NVE sitt høyringsfråsegn kva gjelder omsyn til kraftleidningari og ved uttaksområdet. Ut over dette tek DMF utsegna til etterretning.

Fylkesmannen i Møre og Romsdal

Ein attgjeving av vesentlege delar av Fylkesmannen sitt høyringsfråsegn:

«**Fylkesmannen har ut frå sine ansvarsområde følgande merknader:**
Natur- og miljøvern (naturmangfold, landskap, friluftsliv, grønstruktur)
Skulstadhavet som grensar tett inntil massetaksområdet, er registrert som naturtype brakkvannspoll med verdi B (viktig), ID BN00019376.



Brakkvasspollen og sjøbukta nord for denne har førekomstar av ålegras som er oppvekstbiotop for fisk og andre sjødyr og dermed viktige marine økosystem. Massettaksområdet ligg tett inntil Skulstadhavet og vassfaret mellom Skulstadhavet og Samfjorden. Ved uttak av mineralske massar vil det dannast små partiklar som vert frakta ved overflateavrenning. Fylkesmannen vurderer risikoen som stor for at mineralpartiklar fra anleggsverksemda finn vegen til Skulstadhavet og vassfaret mot Samfjorden. Slike partiklar har negativ effekt på mellom anna fiskens filter i gjellene. Eit aktuelt tiltak for å hindre små steinpartiklar i å nå pollen vil vere sedimenteringsdam. På bakgrunn av fare for uheldig påverknad av naturverdiar rår fylkesmannen difor sterkt til at etablering av sedimenteringsdam vert sett som krav i driftskonsesjonen. Overflatevatnet fra anleggsområdet bør leiast til dam med overløp til Samfjorden, og avskjerast fra Skulstadhavet eller vassfaret mellom fjorden og pollen, då Samfjorden vert rekna som ein meir robust recipient.

Jf. *Forskrift om framande organismar* §18, skal den som sett i verk tiltak som kan leie til utilsikta spreiling av framande organismar i miljøet opptre med aktsemd for å hindre at aktiviteten medfører negative følgjer for det biologiske mangfaldet. Ein skal mellom anna ha kunnskap om kva for risiko for negative følgjer aktiviteten og dei aktuelle organismane kan medføre og om kva tiltak som må gjerast for å førebyggje slike følgjer. Det skal også settast i verk førebyggande tiltak for å hindre at aktiviteten gir negative følgjer for det biologiske mangfaldet og for raskt å avdekke utilsikta spreiling av framande organismar. Det går fram av reguleringsplanen for massetaket at det skal etablerast jordvollar i samband med drifta samt tilbakefyllast masse ved ferdigstilling av uttaksområdet. I periodar kan det truleg også vere aktuelt med mellomlagring av ulike jord- og lausmassar. Når massar vert frakta inn i massettaksområdet vil det vere risiko for spreiling av framande artar. Det må difor stillast vilkår til konsesjonen om at massar som blir tilført ikkje skal innehalde frø eller plantedelar av framande, skadelege organismar.

Konklusjon

Fylkesmannen rår sterkt til at etablering av sedimenteringsdam vert sett som krav i driftskonsesjonen for å hindre små steinpartiklar i å nå Skulstadhavet og vassfaret mellom pollen og Samfjorden. Vidare føreset vi at konsesjonen stillar vilkår om at massar som blir tilført ikkje skal innehalde frø eller plantedelar av framande, skadelege organismar, eller at drifta på anna vi ikkje bidreg til spreiling av framande organismar i miljøet.»

DMF sin kommentar

DMF gjer Tiltakshavar merksam på Fylkesmannen sitt høyningsfråsegn og tek utsegna til etterretning.

Fylkesmannen foreslår at det som avbøtande tiltak blir etablert ein sedimenteringsdam for å hindre små steinpartiklar i å nå skulstadhavet og vassfaret mellom pollen og Samfjorden. DMF vurderer det som hensiktsmessig å sette tiltaket som eige vilkår, sjå punkt 2.4 og 5.7.

Når det gjeld krav om at massar som bli tilført skal være rene og fri for framande artar, vil DMF vise til at også dette er tatt inn som et eige vilkår i punkt 2.4 og 5.7.



Møre og Romsdal fylkeskommune

Ein attgjeving av vesentlege delar av fylkeskommunen sitt høyringsfråsegn:

«Massetaket er omfatta av gjeldande reguleringsplan, med plan-ID 15342011022. Arealbruken er dermed avklart. Vi har ut i frå våre interesser ingen særskilte merknader til ein driftskonsesjon basert på arealbruk fastsett i plan.»

DMF sin kommentar

DMF tek fylkeskommunen sitt høyringsfråsegn til etterretning.

Mørenett AS

Ein attgjeving av vesentlege delar av Mørenett sitt høyringsfråsegn:

«Mørenett AS gjør oppmerksom på at all graving nær 132 kV høyspentlinje (nærmere enn 30 m fra senterlinjen) må varsles til Mørenett AS i god tid før graving igangsettes. For ordens skyld legges ved brosjyre for aktiviteter nær høyspenningslinjer og kabler. Alt masseuttak nærmere enn 30m fra senterlinjen er ikke akseptabelt av hensyn til mastefundamenter etc..»

DMF sin kommentar

DMF gjer Tiltakshavar merksam på Mørenett sitt høyringsfråsegn kva gjelder varslingsplikt for graving nær høyspenningslinjer. Ut over dette tek DMF utsegna til etterretning.

5. Korleis DMF vurderer søknaden om driftskonsesjon

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekommstar på meir enn 10 000 m³ masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønnmessig prøving før det blir avgjort om det skal gjevast driftskonsesjon. I vurderinga av om det skal gjevast driftskonsesjon skal det leggjast vekt på om søkeren er "skikka" til å utvinne førekommsten. Dette inneber at ein skal leggje vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkeren har tilstrekkeleg kompetanse til å drive førekommsten. I vurderinga av om det skal gjevast driftskonsesjon skal det òg leggjast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevast konsesjon.

DMF har vurdert konsesjonssøknaden slik:

5.1. Utvinningsrett

Mineralførekommsten som skal utvinnast tilhøyrar kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd



avtale med grunneigararen om utvinningsretten til førekomsten. Tiltakshavaren har i søknadsprosessen lagt fram avtalar med grunneigarane for gnr./bnr. 79/2 og 80/2 i Haram kommune, datert 05.10.2017 og 09.09.2015, som dokumentasjon for utvinningsrett.

Avtalane gjev Tiltakshavaren utvinningsrett til førekomsten på det området det er søkt om konsesjon for i avtaleperioden.

Etter DMF si vurdering har Tiltakshavaren utvinningsretten til førekomsten.

5.2. Arealmessig status for tiltaket

Konsesjonsområdet har eit areal på kring 39 daa og går fram av vedlegg 1.

Etter reguleringsplan «Massetak i Samfjord» av 13.12.2012 er området regulert til «Steinbrudd og massetak».

5.3. Økonomien i prosjektet

DMF har vurdert Tiltakshavar si næringsoppgåve for dei siste to åra før søknadstidspunktet. DMF har vidare gjort ei vurdering av bedriftas noverande økonomiske tilhøve. På grunnlag av opplysningane som er gjevne vurderer DMF bedifta som økonomisk skikka.

5.4. Driftsplan

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av steinbrotet. Skildringa og kart- og snitteikningar presenterer den planlagde brytinga av førekomsten innanfor arealet på 39 dekar som søknaden gjeld. Det totale volumet fast fjell som skal takast ut er estimert til 600 000 m³. Det årlege uttaket vil variere med marknaden, men det planlagde uttaket per år er 20 – 25 000 faste m³. Det er planlagt drift i 3 etappar. Utdrivne område som ikkje trengst i den vidare drifta, skal setjast i stand fortløpende. Det blir òg presentert ein plan for sikring og avslutting.

Etter DMF si vurdering kan den vedlagde versjonen av driftsplan for Samfjorden massetak i Haram kommune godkjennast. Ein finn at planen tilfredsstiller dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.

Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.



Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

5.5. Bergfagleg forsvarleg drift

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemد.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

5.6. Søkjaren sin kompetanse for drift av førekomsten

I vurderinga av om søkeren har tilstrekkeleg kompetanse er det den totale kompetansen som søkeren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.

Tiltakshavaren har i søknaden gjeve opp Lars-Tore Opshaug som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta.

Etter DMF si vurdering har Tiltakshavaren tilstrekkeleg kompetanse til å drive førekomsten.

5.7. Dei miljømessige konsekvensane av utvinning

I vurderinga av om det skal gjevast driftskonsesjon skal det leggjast vekt på omsynet til miljøet og kulturminne.

Det finst ein godkjend reguleringsplan for uttaket.

Vurdering etter naturmangfaldlova

Naturmangfaldlova § 7 pålegg alle offentlege instansar som tek avgjelder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Reguleringsplanen, høyningsfråsegner og eigne søk i Naturbase og Artskart (22.03.2018) er lagde til grunn for vurderingane etter naturmangfaldlova i DMF si handsaming av søknaden. Det er ikkje kome fram opplysningar i vurderingsgrunnlaget som tyder på at uttaket vil kome i konflikt med naturverdiar i området. DMF reknar kunnskapskravet i naturmangfaldlova § 8 for oppfylt. Sidan uttaket ikkje vil ha nokon større verknad på naturmangfaldet og ein ikkje kan påvise at tiltaket vil påverke truga, nærtruga eller verdifull natur, legg DMF til grunn at det ikkje er nødvendig å gjere vidare vurderingar etter miljøprinsippa i naturmangfaldlova §§ 9–12.

Oppsummering av kjennskapsgrunnlaget

DMF har ikkje gjort funn av prioriterte eller trua arter, eller utvalde eller trua naturtypar i konsesjonsområdet.



Avrenning – vurdering etter forureiningsforskrifta § 30-6

Samfjorden massetak ligg tett inntil Skulstadhavet og vassfaret mellom Skulstadhavet og Samfjorden. Det går fram av Fylkesmannen sitt høyningsfråsegn at tiltaket kan føre til avrenning til ein resipient, ved at små partiklar vert frakta ved overflateavrenning. Fylkesmannen rår sterkt til at etablering av sedimenteringsdam vert sett som krav i driftskonsesjonen. DMF vurderer det som hensiktsmessig å sette tiltaket som et eige vilkår ved tildelinga av driftskonsesjonen, sjå punkt 2.4. I vurderinga har DMF lagt vekt på risikoen av forureining og at tiltaket er foreslått av forureningsstyresmakta.

DMF minner om forureiningsforskrifta kap. 30 og plikta til å melde frå til forureiningsstyresmakta ved oppstart av verksemda. DMF understrekar at tiltakshavaren har plikt til å halde seg innanfor dei grenseverdiane som er fastsette i § 30-6 av forskrifta.

Framande artar

Fylkesmannen har i sitt høyningsfråsegn vist til at når massetaket skal tilbakefyllast vil det være risiko for spreiing av framande artar. Fylkesmannen krev difor, at det vert satt som vilkår til konsesjonen, at massar som blir tilført ikkje skal innehalde frø eller plantedelar av framande, skadelege organismar. Etter DMF si vurdering er det å hindre at masseuttaget medfører negative følgjer for det biologiske mangfaldet eit viktig omsyn, og DMF har difor satt dette som eit eige vilkår ved tildelinga av driftskonsesjonen, sjå punkt 2.4.

DMF sin konklusjon

På bakgrunn av det som er omtala ovanfor har DMF kome til at det ikkje finst faktorar knytte til miljø og kulturminne som tilseier at det ikkje skal gjevast driftskonsesjon. Likevel har vi funne grunn til å setje desse vilkåra:

- Det skal etablerast ein sedimenteringsdam for å hindre små steinpartiklar i å nå skulstadhavet og vassfaret mellom pollen og Samfjorden.
- Massar som blir tilført skal ikkje innehalde frø eller plantedelar av framande, skadelege organismar.

Det er tiltakshavaren som skal bere kostnadene ved tiltaka etter naturmangfaldlova §§ 11-12.

5.8. Tilhøvet til omgjevnadene og dei nærliggjande områda under drift

Mineralressursane skal forvaltas og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr. Uttaksområdet skal sikrast med gjerde under drift ved topp brotkant. Det vil vere skilta ved inngangen til brotområdet og det blir brukt tunge maskinar til å sperre inngangen til området når det ikkje er drift i brotet.

DMF har kome til at dette ikkje er avgjerande moment som talar mot å innvilge konsesjon.

5.9. Kva tiltaket vil ha å seie for verdiskaping og næringsutvikling

Førekomsten det er søkt om driftskonsesjon for fell inn under råstoffgrupperinga:



sand, grus, pukk og leire (byggjæråstoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vregar og anlegg.

Uttaket sysselset vil bidra til å halde oppe sysselsetjinga i distriktet. Drifta kan òg ha ein positiv verknad ved å gje opphav til eller sikre eksistensen til anna næringsverksemd, eller ved at råstoffet kan vere ein strategisk innsatsfaktor i anna verksemd.

5.10. Langsiktig planlegging for etterbruk eller tilbakeføring av området

Uttaket skal setjast i stand i tråd med reguleringsføresegnene. Brotet vil bli avslutta med pallar og permanent gjerde rundt delar av brotområdet. Pallhyllane skal bli tilført jord for etablering av ny vegetasjon. Området vil ved avslutning bli rydda og tekniske installasjoner og eventuelle brakkar/bygningar vil bli fjerna. Ferdig uttatte områder skal setjast i stand fortløpende. Område langs vegen til Skulstad skal setjast i stand med ei jordkledd terrassering med moglegheit for planting av tre, for å unngå oppsetting av permanent gjerde.

Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

5.11. Økonomisk sikkerheit

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelige krava til sikkerheit.

Tiltakshavar ynskjer at DMF vurderer behov, storleik og form på den økonomiske sikkerheita og har difor ikkje kome med noko konkret forslag.

5.11.1. Pålegg om å stille økonomisk sikkerheit og vurdering av kor stor sikkerheita skal vere

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredsstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Tiltakshavar har ikkje kome med eit konkret forslag til storleik og form på den økonomiske sikkerheita.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 840 000 for å sikre at naudsynte sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på kor komplekst uttaket er, massetype, potensiell forureiningsfare, underjords-eller dagbrottsdrift, plassering og lokale tilhøve. DMF har òg lagt vekt på sine eigne erfaringstal for tilsvarande uttak, med tillegg for eksterne og uventade kostnader. DMF har tatt utgangspunkt i dagens opne areal på om lag 18 dekar i berekninga.

5.11.2. Form for sikkerheit

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.



Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

Bankgaranti–oppstartsfasen

DMF vurderer det som naudsynt at Tiltakshavaren, innan 2 månader etter datoén då konsesjonsvedtaket bleigjort, stiller ein bankgaranti som DMF vurderer som tilfredsstillande som påkravsgaranti for eit beløp på NOK 300 000. Dette er naudsynt for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre naudsynte sikrings- og oppryddingstiltak som DMF godtek;
- (ii) Ved konkurs, opphør eller anna avvikling av Tiltakshavaren si verksemد; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldande etter bankgarantien, utan omsyn til motsegner fra Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 300 000. Når beløpet på bankkontoen har nådd NOK 300 000, eller tidlegare etter skriftleg samtykke frå DMF, fell plikta til bankgaranti bort.

Individuell avsetjing, avsetjingsperiode og storleiken på avsetjinga

Deretter skal Tiltakshavaren setje inn midlar på bankkontoen årleg fram til totalbeløpet på NOK 840 000 er nådd. Dei årlege innskotablinn rekna ut etterskotsvis på grunnlag av masseuttaket året før. Det skal betalast inn NOK 0,69 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på 20 år, det vil seie NOK 42 000 per år. I søknaden er det rekna med eit uttak på 60 750 tonn/år, noko som gjev ei årleg avsetjing på NOK 0,69 per tonn.

Innbetalinga for masseuttaket må vere avsett innan 1. februar året etter.

5.11.3. Rapportering og dokumentasjon

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.

I tillegg finn DMF det naudsynt at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette



driftsperioden for uttaket blir endra eller det skjer andre vesentlege endringar i driftsplanen, skal DMF informerast umiddelbart. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Nårvurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor naudsynt å påleggje Tiltakshavaren plikter i så måte i konsesjonsvilkåra.

5.11.4. Justering av sikkerheita

Etter forskrift til minerallova § 2-2 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

6. Kor lenge driftskonsesjonen gjeld

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sle tta
- avtalen om rett til å utnytte førekomst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdragning av utvinningsretten.

7. Plikter for tiltakshavaren

Tiltakshavaren har rettar og plikter som følgjer av minerallova med forskrifter.

Meldeplikt ved oppstart og stans av drift

Seinast éi veke før oppstart av drifta skal tiltakshavaren sende melding til DMF. Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.

Drifta skal utførast med varsemd

Drifta skal utførast med varsemd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

Forsvarleg sikring og opprydding

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.



Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

Ansvaret til bergteknisk ansvarleg

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

Rapportering

Tiltakshavaren skal sende årleg driftsrapport til DMF via «Min side» på dirmin.no.

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar. Etter forvaltingslova § 18 og 19 har partane i saka rett til å sjå saksdokumenta.

For nærmare informasjon om minerallova med tilhøyrande forskrifter, sjå heimesida vår på www.dirmin.no.

Med helsing

Maria Lauritzen
seksjonsleiar

Odd-Arne Eidsmo
rådgjevar

*Dokumentet er elektronisk signert og har difor ikkje handskrivne signaturar.
Sakshandsamar: Odd-Arne Eidsmo*



Vedlegg:

Kart over konsesjonsområde.pdf
AVTALE OM FINANSIELL SIKKERHETSSTILLELSE.docx
PÅKRAVSGARANTI.docx
PANTSETTELSESERKLÆRING FOR ENKLE PENGEKRAV.docx
Godkjent driftsplan.pdf

Mottakarar:

Opshaug Sandtak AS 6200 STRANDA

Kopi til:

Haram kommune	Storgata 19	6270 BRATTVÅG
Møre og Romsdal fylkeskommune	Postboks 2500	6404 MOLDE
Fylkesmannen i Møre og Romsdal	Postboks 2520	6404 MOLDE
Statens vegvesen Region midt	Fylkeshuset	6404 MOLDE
Norges vassdrags- og energidirektoratet Region Midt-Norge	Abels gate 9	7030 TRONDHEIM
Kristin Håvik Breivik	Vågshaugen 18	6270 BRATTVÅG
Idar Hartmann	Hellandsvegen 100	6270 BRATTVÅG
Rune Remme	Søvikvegen 36	6280 SØVIK
Karin Haldis Grøndalen	Grohaugvegen 18 A	3560 HEMSEDAL
Endre Høgset	Skulstadvegen 47	6270 BRATTVÅG
Kjartan Skjønberg	Skulstadvegen 96	6270 BRATTVÅG
Hilde Tordis Sperre	Gjerdevegen 11	6057 ELLINGSØY
Øystein Austnes	Strandgata 34	6270 BRATTVÅG
Trond Bjørnevik Austnes	Nordstrand 84	6050 VALDERØYA
Sølvi Merete Austnes	Fridtjof Nansens vei 56	1472 FJELLHAMAR
Nordvest Nett AS	Kyrkjevegen 12	6240 ØRSKOG
Mørenett AS	Længemyra 6	6160 HOVDEBYGDA